

Erich Bolinius

Bericht über den BSV Kickers Emden

Sendung „Flutlicht“ auf Radio Ostfriesland

Donnerstag, 6.10.2011 18.00 Uhr auf 94.0 bzw. 87,7

Moin, leev Toehörers!

Junge, dor harr `k lesd Saterdag neet mit rekend. Kickers Emden verlüst dat Spöl tegen de RSV Göttingen 05 mit 1:3. Un dormit hemmen se hollen, de Miniserien för beid Vereenen. Heel toe Freid van Göttingen 05, de nananner ´n paar Spölen wunnen hemmen, un toe Leedwesen van Kickers Emden. De Verdreet bi Kickers Emden, de dat dart Spöl up egen Platz verloren un sied seß Spölen keen Spöl mehr wunnen hemmen, was un is groot. Dormit befindt sük Kickers Emden in freei Fall in de Tabell van de Oberliga Neddersassen. Nadem wat ik Saterdag sehn hebb, word dat disse Saison heel stur. Ja, ik kann doran neet mehr so recht löven, dat Kickers toeminnst up de fiefte Tabellenplatz kummt. Upstünns fehlt eben de „Qualität“, so as dat ´n Emden Bladdjeschriever Saterdag in de Halvtied in d' Vip-Ruum meente. Un dor mutt ik hum recht geven. Hett de Mannskupp van Kickers Emden in de lesd Saison un tegen FSV Frankfurt over hör Verhältnisse spölt? Anskienend wall, wenn man de Spölerree in de lesd Weken sücht. Aber villicht kriggt Trainer **Uwe Groothuis** dat noch weer hen un Kickers kann sük erhaalen. Sull mi freien, dormit ok ennelk weer mehr Toekiekers in ´t Oostfriesland-Stadion komen. Tegen Göttingen wassen dat neet maal 400. Sovöl hett de TuS Pewsum, de ´n Klass leger spölt, ok.

Man nu toe dat Spöl. Dat dat Spöl verloren wurr, is besünners argerlik, wiel dat Resultat ok annersrum utgahn kunnt harr. Kickers wull bi moiste Sömmerweer winnen, dat murk man. Al in de 3. Menüte kunn Torjager **Andreas Gerdes-Wurpts** de Göttinger Torwart **Steven Henze** neet overwinnen, de Naskoet van **Navid Ali Torabian** gung knapp over ´t Tor. Kört vör de Halvtiedpaus harr Gerdes-Wurpts weer ´n groot Kans, de Torwart leet de Ball ofprallen, Andy hool sük de weer und leggte of up **Manuel Menzel**, de sien Skoet bleev aber in de Ofwehr hangen. Blot een Menüte later vertruck **Coronado** knapp, nadem he ´n Flank van **Thilko Boekhoff** up engste Ruum wunnerbar annomen harr. In de 45. Menüte köppte Boekhoff dann na ´n Flank van Coronado in ´t Tor. Man de Schiri fleite „Abseits“. Mutt wall so west wesen, wall de Kickerspölers neet reklameerten.

Man in de 73. Menüte was dat ennelk sowiet. **Didier Webessie** harr ´n Flank van de linke Sied van Boekhoff neet recht truffen, de Ball hüpfte mit ´n Drall dör de Straafruum - un Andreas Gerdes Wurpts drückte de Ball over de Torstreek.

Man murk Kickers in disse Tied aber al an, dat se in de Rügelsbewegen neet mehr goed drup was. Of Kickers dat recht System an disse Dag harr, dat is de Fraag. In de eerst Halvtied was Andreas Gerdes-Wurpts de eentigste Spitze. Dat was na mien Menen up egen Platz tegen so ´n Mannskupp as tegen Göttingen toe minn. In de twee Halvtied hett Trainer Groothuis dann dat System ännert. Webessie kwamm as tweed Störmer. Man de hett an disse Dag neet völ utfreten. Na dat 1:0 wull Kickers wesseln, **Gonzales** sullte komen. Man genau toe de Tied, in de 80. Menüte, full de Utgliek dör ´n Sköt van halvlinks ut goed 20 Meter. Wo kunn man de Göttinger blot sovöl Platz laten, fraag ik mi? Dorna full Kickers heel un dall utnanner, wall se ok achtern open mook. In de 91. Menüte dann dat 1:3. Manuel Menzel was neet gau genug toerügg komen. Ja, dat was ´n heel maal Namiddag för Kickers Emden. Ik sülvst was ok leep untoefree. Intüsken kiek ik al weer na vörn. Dat mutt einfach beter worden!

All Fans könt blot hopen, dat dat Saterdag tegen Rotenburg, de stahn up de vörlesde Platz, anners word un Kickers ennelk maal weer winnt. Ik löv dat, wall Bennet un Müller dann weer uplopen könen. De beid Spölers hemmen Kickers fehlt! Na ´n Sieg gifft dat ok weer Ruh van de Fans. In de Kickers-Fan-Forum word ja ´n Bült schreven. Präsident **Günter Schmalzer**

word dor ok up Koorn nohmen. Villicht seggt he noch 'n paar Worden in disse Sendung dortoe. Wat wi neet bruken können, is Striet unnernanner. Wi mutten all an een Tau trecken, aber blot in een Richt!

So, toe Schluss noch, so as alltied, 'n kört Foetballwitz. Hopentlik is mi mien Foetballfründ und Edelfan van de HSV,. Manni Höppner, neet düll.

**Weffe Vereen hett de lüttjeste Brauereei in Dütskland?
De HSV, de hett upstünns blot 11 Flersen.**

So leev Toehörers van Radio Oostfreesland,
ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt - nettso as Kickers Emden – neet unnergahn.
Bit anner Maal
Joe
Erich Bolinius ut Emden-Petjem.